

**■ TRIBUNA POLITICA**

# In mussament da prestaziun da las forzas da segirezza svizras

DA CHRISTIAN RATHGEB,  
CUSSEGLIER GUVERNATIV

**I**l FEM 2018 tutga gia puspè tar il passà. En memoria restan las fermas navaglias a Tavau sco er la gronda resonanza da la publicitad a la visita dal president american *Donald Trump*.

**C**un l'annunzia da la Chasa alva ch'il president american Donald Trump visita il FEM da quest onn è la dieta annuala vegnida en il center da la publicitad e da las medias gia avant sia avertura. A partir da quest mument n'èsi passà betg in di senza ch'igl è vegnì rapportà davart quest president che polarisescha zunt fitg er en ils Stadis Unids. En brevs da lecturs, en columnas ed en contribuziuns da radio èsi vegnì discutà tge che questa visita portia, sche la segirezza saja garantida e tge custs supplementars che resultian.

**T**enor mes avis fissi fauss da reducir la visita d'in president american mo a dumondas da segirezza ed a consequenzas finanzialas. Tar las grondas prestaziuns da noss pajais democratic tutgan il dialog politic sco er la pussaivladad da represchentar en moda paschavla differents puntgs da vista e differentas opiniuns. Quest dialog ha già lieu er quest onn cun nu-



merus represchentants da la politica, da la scienza e da l'economia ed è ina valur essenziala da las dietas annualas dal FEM.

**T**ras quai ch'il congress ha già lieu bunamain senza difficultads è la lavur grondiusa da las forzas da segirezza partecipadas dentant bunamain ida en emblidanza; ina lavur ch'è sa cumprovada gia dapi blers onns e ch'è da chapir sco mussament da prestaziun da la Svizra. Or da vista actuala n'èsi strusch pli imaginabel che las emprimas scuntradas dal Simposi europeic da management, il precursor dal Forum economic mundial (FEM), pudevan vegnir realisadas senza dispositiv da segirezza spezial. Il policist da Tavau da quella giada aveva ils emprims onns la gronda responsabladad da procurar – cun ses chaun – per la segirezza da la chasa da congress sco er da las partecipantas e dals participants dal simposi. Fin l'onn 1988

garantiva la polizia chantunala dal Grischun per la segirezza dal FEM, senza sustegn d'autras forzas polizialas. Ma pervia da la nova situaziun da smanatscha ha il dispositiv da segirezza stuì vegnir extendì cuntinuadamain ils onns suandants, ed ils auters chantuns sco er l'armada han stuì vegnir engaschads. Er sche la responsabladad generala per l'acziun da las forzas da segirezza a la dieta annuala dal FEM è tar il cumandant da la polizia chantunala dal Grischun e politicamain tar il comité dal FEM da la regenza grischuna, pia en mauns civils: senza il sustegn prezius da tut ils chantuns, da las citads grondas, da l'armada sco er d'ulteriurs partenaris na pudess quest eveniment betg vegnir realisà.

**P**ervia da sia structura federalistica vegn la Svizra gugent designada a l'exteriur sco pajais da model per la democrazia. Il federalissem ha dentant per consequenza ch'ils singuls chantuns e las vischnancas vegnan integrads en ils process da planisaziun e da decisiun sch'i sa tracta da dumondas da nivel svizzer. La rait naziunala da segirezza, che funcziuna oz fitg bain, tegna quint da questas structuradas ed è danovamain sa cumprovada. E da quest fatg dastgain nus esser superbis.